

## MARUM PAI VÔTS DAI FURLANS

Siôr Diretôr,

mi sbrochi cun chiste letare par fâ cognossi il marum ch'ò ten tal cûr pal mût ch'a son ladis lis ultimis eleziions pulitichis in Italie.

Il gno mistîr di inpiegât tun ufissi public mi puarte a vê da fâ cun tun slac di int; int che à dibisugne, int ch'a patis.

La prime robe ch'a domandin al è se jô o feveli furlan. Ur vierç il cûr apene che ur rispuint te nestre mari lenghe.

Esal mai pussibil ch'a si pratindi di fevelâ par furlan tai ufissis publics e in altrô e cuant che si à di votâ si finissi cul votâ pai partîz talians e no pal Friûl?

Ogni moviment furlan nol rivarâ mai a diventâ une fuarce pulitiche di chês ch'a còntin, se prime di dut no fasarìn la cussience dai furlans.

Par rivâ a chest intendo, bisugne sveâ il popul furlan e no indurmidîlu come che àn fat i partîz dal stivâl.

Scusaimi il sfogo

G. B. Ferrarin - Rivignan

Ciâr siôr Ferrarin,

mi pâr che Lui al à fate la domande e cjatade ancje la midisine juste.

Esal pussibil che a Bolzan e in Valdoste le vetin capide e chi di nô e stenti tant a jentrâ?

Riguart al sfogo Lu scusi cun dut il cûr. Ansit Lu prearès di lâ a sfogâsi cun chêi movimenz furlans che àn tante pice di inparâ i vissis dai talians.

O soi sigûr che Lui nol molarâ e ch'al continuarâ a dânus une man sun cheste strade.

Grassie

Jugn 1979